

繡刻紫釵

記定本

目錄

第一齣 本傳開宗

第二齣 春日言懷

第三齣 插釵新賞

第四齣 謁鮑述嬌

第五齣 許放觀燈

第六齣 墮釵燈影

第七齣 託鮑謀釵

第八齣 佳期議允

第九齣 得鮑成言

第十齣 回求僕馬

第十一齣 妝臺巧絮

第十二齣

僕馬臨門

第十三齣

花朝合卺

第十四齣

狂朋試喜

第十五齣

權夸選士

第十六齣

花院盟香

第十七齣

春闈赴洛

第十八齣

黃堂言餞

第十九齣

節鎮登壇

第二十齣

春愁望捷

第二十一齣

杏苑題名

第二十二齣

權嗔計貶

第二十三齣

榮歸燕喜

第二十四齣

門楣絮別

第二十五齣

折柳陽關

第二十六齣

隴上題詩

第二十七齣

女俠輕財

第二十八齣

雄番竊霸

第二十九齣

高宴飛書

第三十齣

河西款檄

第三十一齣

吹臺避暑

第三十二齣

計局收才

第三十三齣

巧夕驚秋

第三十四齣

邊愁寫意

第三十五齣

節鎮還朝

第三十六齣

淚展銀屏

第三十七齣

移參孟門

第三十八齣

計哨訛傳

第三十九齣

淚燭裁詩

第四十齣

開箋泣玉

第四十一齣

延媒勸贅

第四十二齣

婉拒強婚

第四十三齣

緩婚收翠

第四十四齣

凍賣珠釵

第四十五齣

玉工傷感

第四十六齣

哭收釵燕

第四十七齣

怨撒金錢

第四十八齣 醉俠閒評

第四十九齣 曉窗圓夢

第五十齣 玩釵疑歎

第五十一齣 花前遇俠

第五十二齣 劍合釵圓

第五十三齣 節鎮宣恩

紫釵記

明 湯顯祖 著

第一齣 本傳開宗

〔西江月〕〔末上〕堂上教成燕子。窗前學畫蛾兒。清歌妙舞駐遊絲。一段煙花佐使。點綴紅泉舊本。標題玉茗新詞。人間何處說相思。我輩鍾情似此。

〔沁園春〕李子君虞。霍家小玉。才貌雙奇。湊元夕相逢。墮釵留意。鮑娘媒妁。盟誓結佳期。爲登科抗壯。參軍遠去。三載幽閨。怨別離。盧太尉設謀招贅。移鎮孟門西。還朝別館禁持。苦書信。因循未得歸。致玉人猜慮。訪尋貲費。賣釵廬府。消息李郎疑。故友崔韋。賞花譏諷。纔覺風聞事兩非。黃衣客。迴生起死。釵玉永重暉。

黃衣客強合鞋兒夢。

霍玉姐窮賣燕花釵。

盧太尉枉築招賢館。

李參軍重會望夫臺。

第二齣 春日言懷

珍珠簾〔生上〕十年映雪圖南運。天池浚。兀自守泥塗清困。獻賦與論文。堪
咳唾風雲。羈旅消魂寒色裏。悄門庭報春相問。才情到幾分。這心期占。今春似
穩。〔青玉案〕盛世爲儒觀覽遍。等閒識得東風面。夢隨彩筆綻千花。春向玉階添幾線。上書北闕曾留
戀。待漏東華誰召見。殷勤洗拂舊青衿。多少韶華都借看。小生姓李。名益。字君虞。隴西人氏。先君忝
參前朝相國。先母累封大郡夫人。富貴無常。才情有種。紅香藝苑。紫臭時流。王子敬家藏賜書。率多
異本。梁太祖府充名畫。並是奇蹤。無不色想三冬。聲歌四夏。熊能日上。連城抱日月之光。閃閃宵飛。
出獄吐風雲之氣。只是一件。年過弱冠。未有妻房。不遇佳人。何名才子。比來流遇長安。占籍新昌客
里。今日元和十四年立春之日。我有故人劉公濟。官拜關西節鎮。今早相賀回來。恰逢着中表崔允
明。密友韋夏卿。相約此間慶賞。秋鴻看酒。〔秋鴻上〕驚開酒色三陽月。喜逗花梢一信風。酒已完備。
〔韋崔上〕

〔賀聖朝〕天心一轉鴻鈞。個中孤客寒暄。旛頭春信已爭新。鄉思怯花辰。〔見科〕

〔韋〕喜氣來千里。〔崔〕春風總一家。〔生〕宜春惟有酒。長此駐年華。〔生把酒介〕

〔玉芙蓉〕〔生〕椒花媚曉春。柏葉傳芳醞。願花神作主。暗催花信。靈池凍釋浮魚陣。上苑陽和起雁臣。〔合〕青韶印。看條風拂水。畫燕迎門。年年春色倍還人。〔前腔〕〔崔韋〕黃雲正朔新。麗日長安近。向朝元共祝。歲華初進。洞庭春色寒難盡。玉管飛灰煖漸熏。〔合〕春風鬢。笑林中未有。柳上先過。屠蘇偏讓少年人。〔生〕二兄說少年人。似俺李十郎亦容易老也。

〔簇御林〕歲寒交無二人入。春愁有一身。報開庭草樹青回嫩。和東風吹綻了。袍花襯。〔合〕問東君。上林春色。採取一枝新。〔韋〕君虞說被東風吹綻袍花襯。是說功名未遂。要換金紫荷衣。這也不難。聞得你故人劉公濟節鎮關西。今年主上東巡。未知開科早晚。你且相隨節鎮西行。此亦功名之會也。〔生〕豪傑自當致身青雲上。未可依人。〔崔笑科〕夏卿不知。東風吹綻袍花襯。是說衣破無人補。此事須問一個人。〔生〕是誰。〔崔〕曲頭有個鮑四娘。穿針老手。央他一線何如。〔生〕不瞞二兄。鮑四娘于小生處略有往來。但是此中心事。未露十分。〔韋崔〕才子佳人。

自然停當也。

〔前腔〕〔韋〕你染袍衣京路塵。望桃花春水津。〔生〕要命哩。〔崔〕你外相兒點撥的花星運。〔生〕要錢哩。〔崔〕你內材兒抵直的錢神論。〔合前〕

〔尾聲〕你眉黃喜入春多分。先問取碧桃芳信。俺朋友呵。覷不的你酒冷香銷少個人。

漸次春光轉漢京。

風流富貴是生成。

無媒雪向頭中出。

得路雲從足下生。

第三齣 插釵新賞

〔滿宮花〕〔老旦上〕春正嬌。愁似老眉黛。不忺重掃。碧紗烟影曳東風。瘦盡曉寒猶着。〔蝶戀花〕誰翦宮花簪綵勝。整整韶華。爭上春風鬢。往事不堪重記省。爲花長帶新春恨。春未來時先借問。還恨開遲。冷落梅花信。今歲風光消息近。只愁青帝無憑準。老身霍王宮裏鄭六娘是也。小家推碧玉之容。大國薦塗金之席。陽城妬盡。那曾南戶窺郎。冰井才多。每聽西園召客。晚年供

佛。改號淨持。生下女兒。名呼小玉。年方二八。貌不尋常。昔時於老身處。涉獵詩書。新近請鮑四娘商。量絲竹。南都石黛。分翠葉之雙蛾。北地燕脂。寫芙蓉之兩頰。驚鸞冶袖。誰偷得韓掾之香。繡蝶長裙。未結下漢姝之佩。愛戴紫玉燕釵。此釵已教內作老玉工。候景先雕綴。還未送來。正是新春時候。不免喚他出來。一望渭橋春色。浣紗。小姐那裏。

〔滿宮花後〕〔旦同浣紗上〕盡日深簾人不到。眉畫遠山春曉。〔浣〕紅羅先繡踏青鞋。花信須催及早。〔旦〕母親萬福。〔老旦〕女兒免禮。〔旦〕母親。因甚有喚孩兒。〔老旦〕新歲春光明媚。娘女們向渭橋望春一回也。〔行科〕冰破池開綠。雲穿天半晴。遊心不應動。爲此欲逢迎。我老
大年華對此春新也。

〔綿搭絮〕繡闌清峭。梅額映輕韶。畫粉銀屏。寶鴨薰爐對寂寥。爲多嬌。探聽春韶。那管得翠幃人老。香夢無聊。兀自裏暗換年華。怕樓外鶯聲到碧簫。
〔前腔〕〔旦〕妝臺宜笑。微酒暈紅潮。昨夜東風。戶插宜春勝欲飄。倚春朝。微步纖腰。正是弄晴時候。閣雨雲霄。紗窗影。綵線重添。刺繡工夫把畫永銷。

〔前腔〕〔浣〕個人年少。長是索春饒。忽報春來。他門戶重重不奈瞧。滿溪橋。紅袖相招。都准備着詠花才調。問柳情苗。小姐呵。無人處和你拾翠閒行。你淡翠眉峯鎖自描。〔侯景先上〕新妝燕子鈿金釧。舊試蟾蜍切玉刀。報知鄭夫人。老玉工侯景先玉釵完成。敬此陳上。〔老叫浣取釵看介〕好匠手也。以萬錢賞之。〔侯謝介〕琢成雙玉燕。酬賞萬金蚨。〔下老〕浣紗。今日佳辰。便將西州錦剪成宜春小繡牌。挂此釵頭。與小姐插戴。〔浣下取鏡上云〕剪成花勝在此。〔老挂牌釵首與旦旦拈看科〕

〔前腔〕〔旦〕玉工奇妙。紅瑩水晶條。學鳥圖花點綴釵頭金步搖。〔浣照旦插釵科〕〔旦〕鞦韆綃。翠插雲翹。正是剪刀催早。蜂蝶晴遙。〔合〕問雙飛燕爾何時。試拂菱花韻轉標。

〔尾聲〕繡簾珠戶好藏嬌。掩屏山莫放春心早。還把金針鳳眼挑。

阿母凝妝十二樓。斬新春色喚人遊。

玉釵花勝如人好。今日宜春與上頭。

第四齣 謁鮑述嬌

〔祝英臺近〕〔鮑四娘上〕翠屏閒。青鏡冷。長是數年華。行雲夢老巫山下。殢酒愁春。添香惜夜。獨自個溫存幽雅。〔少年遊〕簾垂深院冷蕭蕭。春色向人遙。暗麝生處。玉箏絃索。紅淚覆蛟綃。舊家門戶無人到。鴛鴦被。半香銷。個底韶華。阿誰心緒。禁得恁無聊。自家鮑四娘。乃故辭駙馬家歌妓也。折勞從良。十餘年矣。生性輕盈。巧于言語。豪家貴戚。無不經過。挾策追風。推爲渠帥。每蒙隴西李十郎往來。遺贈金帛不計。俺看此生風神機調。色色超羣。幣厚言甘。豈無深意。必是託我家門。覓求佳色。俺已看下鄭娘小女。此女美色能文。頗愛慕十郎風調。只待他自露其意。便好通言。早晚李郎來也。

〔唐多令〕〔生上〕客思繞無涯。青門近狹斜。愔愔巷陌是誰家。半露粉紅簾下。閒覓柳。戲穿花。〔見介〕翠宿香梢未肯消。與卿重畫兩眉嬌。〔鮑〕新春螺黛無人試。付與東風染柳條。〔生〕四娘。幾載相看。新春闕訪。爲何門庭蕭索至此。

〔祝英臺〕〔鮑〕聽說來。憶嬌年。人自好。今日雨中花。俺也曾一笑千金。一曲紅綃。

宸遊鳳吹人家參差。憔悴損鏡裏鴛鴦。冷落門前車馬。〔生〕還尋個伴兒。〔鮑〕這些時幾曾到賣花簾下。十郎。你時時金帛見遺。無恩可報。今日爲何光顧。

〔前腔〕〔生〕遊冶自多情。春又惹。早則愁來也。漸次芳郊款步。幽庭笑向卿卿閒話。〔鮑〕妾半落鉛華。何當雅念。〔生〕還佳。個門中風月多能。更是雨雲熟滑。似秋娘渾不減舊時聲價。

〔前腔〕〔鮑〕休傻。咱意中人。人中意。還似識些些。看你才貌清妍。禮數謙洽。非關採弄殘花。十郎禮有所求。必有所下。寸心相剖。妾爲圖之。〔生〕堪嗟。瘦伶仃才子身奇。尙少個佳人檠架。問誰家可一軸春風圖畫。

〔前腔〕〔鮑〕知麼。俺爲你高情。是處的閒停踏。〔生〕有麼。〔鮑〕十郎。蘇姑子作好夢也。有一仙人。謫在下界。不邀財貨。但慕風流。如此色目。共十郎相當矣。是有個二八年華。三五嬋娟。又不比尋常人家。〔生驚喜科〕真假。你干打哄。蘸出個桃源。俺便待雨流巫峽。〔跪科〕這一縷紅絲。少不得是你老娘牽下。〔鮑〕起來說與詳細。是故霍王小女。字小

玉王甚愛之。母曰淨持。淨持卽王之寵姬也。王初薨。諸弟兄以其出自微庶。不甚收錄。因分與資財。遣居于外。易姓爲鄭氏。人亦不知其王女。姿質穠豔。一生未見。高情逸態。事事過人。音樂詩書。無不通解。昨遣我求一好兒郎。格調相稱者。俺具說十郎。他亦知有十郎名字。非常歡懌。住在勝業坊。三曲甫東間宅是也。〔生〕可得一見。〔鮑〕此女尋常不離閨閣。今歲花燈許放。或當微步天街。十郎有意。可到曲頭物色也。〔生〕領教。〔鮑〕花燈之下。你得見異人。老娘便向十郎書齋領取媒證。

〔尾聲〕〔生〕從今表白俺衷情話。〔鮑〕肯字兒還在他家。〔生〕你成就俺一世前程。休當要。

紫陌花燈湧暗塵。

驚心物色意中人。

此中景若無佳景。

他處春應不是春。

第五齣 許放觀燈

〔點絳脣〕〔京兆府尹上〕聖主傳宣。風調雨順都如願。慶賞豐年。世界花燈現。金銷通霄啓玉京。遲遲春箭入歌聲。寶坊月皎龍燈濟。紫館風微鶴焰平。自家京兆府尹是也。今夕上

元佳節。月淡風和。蒙聖上宣旨。分付士民通宵遊賞。正是金吾不禁夜。玉漏莫相催。〔下〕

〔玩仙燈〕〔老旦上〕上元燈現。畫角老梅吹晚。風柔夜煖。笑聲喧。早占斷紅妝宴。

〔前腔〕〔旦上〕韶華深院。春色今宵正顯。〔浣上〕年光是也。拚無眠。數不盡神仙

眷。〔憶秦娥〕〔老〕元宵好。珠簾捲盡千門曉。〔旦〕千門曉。禁漏花遲。玉街春早。〔浣〕紅妝索向千蓮照。

笙歌欲隱千金笑。〔合〕千金笑。月暈圍高。星球墜小。〔旦〕今夜花燈佳夕。奉夫人一杯酒。〔老〕費你

心也。正是女郎春進酒。王母夜燒燈。

〔貳貳令〕〔老〕賞元宵似今年。去年天街上。長春閨苑。星橋畔。長明仙院。暢道

是紅雲擁。翠華偏。歡聲好。太平重見。

〔前腔〕〔旦〕賞元宵不寒天。暖天十二樓闌干。春淺三千界。芙蓉妝豔。都則是

瑞烟浮。香風軟。人語隱。玉簫聲遠。

〔前腔〕〔浣〕賞元宵暢燈圓月圓。整十里珠簾盡捲。達萬戶星球亂點。咱趁着笙

歌引。笑聲喧。怎放卻百花中漏聲閒箭。裏過老夫人郡主。同步天街遊賞一會。〔老〕使得。

〔尾聲〕端的是春如晝夜如年。天街上暗香流轉。便拚到月下歸來誰分去眠。
金屋何能閉阿嬌。

成團打隊向燈宵。

嚴城不禁歲蕤鎖。

銀漢斜通宛轉橋。

第六齣 墮釵燈影

〔鳳凰閣引〕〔生上〕絳臺春夜。冉冉素娥欲下。香街羅綺映韶華。月浸嚴城如

畫。〔韋崔〕鈿車羅帕相逢處。自有暗塵隨馬。〔生〕笙歌世界酒樓臺。雞踏蓮花萬樹開。誰家

見月能端坐。何處聞燈不看來。二兄。昨夜鮑四娘教咱。今夜花燈。覷着那人來也。咱於萬燭光中。千
花豔裏。將笑語遙分。衣香暗認。不枉今年翫燈。道猶未了。遠遠望見王孫仕女看燈來也。〔王孫仕

女笑上〕

〔園林好〕謝皇恩燈華月華。謝天恩春華歲華。遍寫着國泰民安天下。遨頭去

唱聲譁。〔下〕

〔前腔〕〔老旦引旦浣上〕好燈也。說燈花南天門最佳。香車隘挑籠絳紗。喝道轉身